

**Hans Pienaar**

## Bomme oor Bagdad

Hans Pienaar is 'n produksie-redakteur by Independent Newspapers, Johannesburg. Hy het Irak in November 2002 besoek. Sy jongste publikasie is die digbundel, *Die Taal van Voëls*, bestelbaar by [hanspienaar@mweb.co.za](mailto:hanspienaar@mweb.co.za)

I

In 'n boord lank terug, omring deur kampe  
in ons weermagsdorp, by elke ingang  
kanonne of vliegtuie om aan te hang,

skietbane rinkelend van doppies, parate  
wagte wys hoe bol hul onder ons broeke,  
onthou ek een vrug, na al die jare. Granate,

nou nog skaarser, was toe al eksoties genoeg  
om net aan te peusel en te pik. Versigtig  
oopgetrap onder voete, het die vlees pittig

vertel van ander dinge, disseksies jare  
later, muisies ingepak in ingewande.  
Geblikte soutvleispienk. Met taai hande

het ons ander granate, groen en giftig  
oor heinings gegooi, by deure ingerol,  
met ons tande oopgepluk, heroïes op geval.

In die bioskoop was dit dikwels swart en wit.  
Ons kon nog nie weet die natuur se weergawe  
was die regte een: Lyke op 'n slagveld, ledemate

vol bloed, rosig van verrotting, tot op die been  
van menslikheid, tot in die grys murg vuig  
van sterflikheid. Ek wil weer aan die pitjies suig,

so vol onvanpaste smake. Maar hul soetigheid bly  
karig, hul kennis buite bereik. Ons maak pofkoring  
as die oorlogswolke saampak om die TV-toring

## II

Soos 'n hoop vol outydse bomme (uit Tintin,  
ou tydskrifte oor anargiste, piramides voor  
slawekastele) lê die granate in die gekantelde  
stootwaens in Bagdad se strate. Tossels twyge  
punt soos lonte. Die smous breek een oop,  
hou die korrels uit, wedywer met die bokkaas  
aangebied aan die skares op 'n mes met flou  
beloftes glimmerend in sy halfmaan. Half-dood  
mense: Koop my ou kalashnikov. Die olyfgroen  
houer vir mosterdgas. Vrees dwaal, lag verleë.  
Ons soek net vrede. Die skrik van Al Mariye  
(waar mense verdamp het, skraapsels velle  
teen die mure, 'n vloer verkleur deur bloed.)  
in die agterkoppe: Die son straal oor geraamtes  
van staal uit die beton geruk. Die slaggate  
van missiele is rondter as die rondste granate

## III

Die wagte in Hooglied het Salomo se geliefde mishandel  
Haar geslaan, gewond, en beslag gelê op haar mantel

Soos 'n granaatskyf agter 'n sluier is die geliefde slank  
As sy 'n deur is slaan hul haar toe met 'n sederplank

Helde omring Salomo se draagstoel en rookpilare  
swaard aan die heup weens die nagtelike gevare

By haar moedershuis wag 'n kom vol granatemos  
Hy wil haar borste pluk soos 'n druiwetros

'n Duisend sikkels hou ek vir u, my wingerd se vrug  
Soos die jong takbok op die balsemberg is u wat vlug

Hul skuil in die townships, haar nawel soos die kom  
In die hoek. Staan vroeg op, gaan kyk of sy granate blom

O soelamiet, o soelamiet, soos vaandels van slagordes  
Is u aangesig skoon. Na die oonde stroom die hordes

#### IV

Soos borste in my arms twee granate net twee is al  
Wat ek wil red uit hierdie hel nou volbring soos voorspel  
Padtekens oral wys Babilon, Ur, Nineve, stede nog ouer  
Daar kom ons hulp nie vandaan ook nie Nebukadneser  
Of sy skrif teen mure wat nie meer staan om te vertel  
Van die heersers besetters vredemakers demokrate  
wat meet en pas en praat met gediertes tot hulle mal  
word self gillende drillende monsters van staal soldate  
vol skubbe my granate saf gedruk terwyl ons die  
gewondes vlug oor woestyne want wie moet ons glo?  
Die koalisie sê hul veg net teen spesifieke teikens so  
waarom ons uitverkies waarom ons uitsonder min  
genoeg om mis te kyk is ons my pap granate glip  
uit my hande te laat gryp ek te dun is die skil  
die vlees klou aan tenktande deur my hemp syfer  
bloed aan my boesem deur my geliefde gespil

#### V

Elke langeraad het 'n handgranaat  
En 'n slommernommer in sy boek  
Elke kanonnier het 'n visier  
En 'n opperstopper in sy broek

Fregatte loop op gladde ratte  
En trosse goddelose matrose  
Alle vliegdekskepe is geslepe  
Met 'n helifamilie uit die bose

Elke straler het 'n terugbetaler  
En 'n skerperwerper tuis  
Elke bommer het sommer  
'n ietsie ekstra in sy kruis

Elke kameraad vra 'n passaat  
En 'n drosterroster teen 'n tent  
Elke kaptein vermy 'n landmyn  
En 'n vorderorder sonder end

Elke adjudant is amusant  
Met manne vol kanne tee  
Elke generaal is joviaal  
Met 'n lekkerwekker om twee

Alle infanteriste is vandaliste  
Met 'n rommeltrommel vol  
Alle artilleriste is fataliste  
met wielemissiele in die kol

Elke soldaat het genoeg ruggraat  
En 'n geraamte sonder skaamtes  
Elke gewonde is sonder sonde  
En sy vrome drome vol gedaantes

Elke samjoor seek skoor  
met 'n skelmhelm op sy kop  
elke sersant is aan die brand  
met 'n wakkerblaffer reg

Elke kapelaan is afgestaan  
Met 'n palmsalm in sy hoed  
Elke veteraan is aangedaan  
Oor die rye kiste vol moed

Elke koalisie het 'n polisie  
Op 'n kommergrommernet  
Vir elke opposisie se posisie  
Is daar 'n buffelsnuffelwet

VI

Dit was toe nie 'n appel of perske of lemoen  
Aan die Boom van Kennis van Goed en Kwaad  
Maar dalk 'n vrug sonder familie, wat alleen  
In die botaniese registers staan: Granaat

Dit was ook nie nodig vir die vrou om te pluk  
Net vir die proe, want die opgewonde man  
Kon haar maklik keer, laat teruglê in die mik  
Haar bene oor die stamme se wydte span

Om te sê: Nes God se vrug is jy rosig  
Van binne. Laat my die pitjies plant  
In jou diepste grond met my nat hand

Laat my lek aan die pitte van jou borste  
Laat my rib in jou oermos, in jou stroop  
Die kiem van paradyslikheid doop